



Aatsitassarsiornermi Avatangiisinut Aqutsisoqarfik

Naalakersuisut

eamra@nanoq.gl

Nuuk 20. dec. 2016

Kalaallit Nunaata kitaata avannaani Baffin Bugtimi uuliamik gassimillu (kulbrintinik) ujarlernissamut atuinissamullu atatillugu suliniuteqarnermi avatangiisinik naliliineq

Tusarniutigineqartumut Inuit Issittormiut Siunnersuisoqatigiiffiata (ICC) akissutaa matumuuna nassiupparput.

Aallarniutigalugu KNAPK-ip tusarniaanerup piffissami sivikippalaami ingerlanneqarneranik isummorsornera isumaqatigalugu nalunaarutigissavarput, kajumissaarutigissallugulu suliat taamatut annertutigisut pingaaruteqartigisullu tusarniutigineqartarnerat sivisunerusumik piffissalerneqartassasut.

Tamatuma saniatigut aamma tusarniaanerme akissutigineqareersimasut, imartallu pineqartup qanoq mianernartigineranik erseqqissaviusut isumaqatigaavut.

Imartap Nunatta Canadallu avannaata akornanniittup ukiuni makkunani sammineqarnera annertooujussuuvoq, tamannalumi pissutissaqarpoq tassami imartap uumassusilinnik sinerissat sinnerinut pilersuisuunera manna tikillugu tamakkiisumik ilisimaneqanngilaq, qularnanngilarli nunatsinni akitsinnilu Canadami uumassusilinnik inuuniuteqarnermut annertooujussuarmik sunniuteqartoq. Tamannalumi aamma tusarniutigineqartumi erseqqissumik allaaserineqarpoq.

Ilaatigut tamanna pissutigalugu ICC Nunatsinni Canadamilu 2016-imi januarimi Isumalioqatigiissitanik pilersitsippup, imartap ilaata sikuneq ajortup ”Pikialasorsuup” siunissami qanoq atorneqarumaarneranut qanorlu atuinerup aqunneqarsinnaaneranik inassuteqaasiornissamik siunertalimmik.

Isumalioqatigiissitap manna tikillugu Canadap Avannaani (Nunavummi) Nunattalu avannaarpiaaniit Upernavik tikillugu nunaqarfinni illoqarfinnilu tusarniaanerit ingerlatereerpai, tamannalu tunngavigalugu nalunaarusiaq siulleq ulluni makkunani suliarineqarpoq ukiortaap aallartilaarnerani naammassisussatut naatsorsuutigineqarluni.

Isumalioqatigiissitap pingaartitaralugu tunngavigaa inuit imartamut sineriallit uumassusilinnillu inuuniuteqartut salliullutik isummersortinneqassasut taakkualu isummersuutaat kissaataallu inassuteqaasionerme aallaavigineqassasut.

Taamatut isummernermut tunngaviusut arlaliupput, pingaarnerrillu eqqaassagaanni tassaallutik; siullermik, tamaani imartamut sineriammi inuusut annertuumik aalisarnermik piniarnermillu inuuniuteqarput, imartarlu innarlerneqassagaluarpat toqqaannartumik eqqugaasinnaallutik, aappasaanillu; imartami pineqartumi mingutitsisoqassagaluarpat tamanna Nunatta imartaanut sunniuteqaannarani aamma Canadap imartaanut naggueqatittalu inuuffigisaannut taamatulli sunniuteqartussaavoq. Tassa mingutitsineq killeqarfiit pitarlugit siaruartussaavoq naggueqatigiillu uumassusilinnik inuuniuteqartut ajortumik sunnerataannaallugit.

Nunatsinni naalakkersuinikkut oqartussaasut ukiuni kingulliinerusuni imartatsinni uuliamik ujarlernerit pillugit mianersornerunissamik ilaatigullu allaat ujarlernernik unitsitsigallarnissamik kisaateqarnerat tapersorsornarpoq. ICC-miit taamatut isummersorneq tunngaviatigut isumaqatigaarput, naak aamma inuussutissarsiornikkut ineriartortitsisariaqarneq, aatsitassarsiorneq isumaanaatumik ingerlanneqartoq ilanngullugu, tapersorsoraluarlugu.

Suliap matumani pineqartup nanginneqarnerani tusarniaanerit sukumiinerusut aammalu minnerpaamik innutaaqataasunik avannaarpiaani najugaqartunik toqqaannartumik peqataatitsiffiusut ingerlanneqarnissaat sakkortuumik inassutigissavarput.

Tusarniaanerimut akissuteqarnermi matumani ICC-mi periarfissaqarsimanngilagut paasisstissat annertuut sukumeeqqissaartumik nalilersussallugit. Tamanna pissutigalugu akissuteqaaterput isummani tunngaviusunik aallaaveqarpoq, pingaartumillu imartap pineqartup mianernarnera avannaarsuanilu inuuniarnermut pingaaruteqarluinnarneranik erseqqissaaviulluni.

Neriuppugut suliap ingerlaqqinnerani aamma tusarniaavigineqartut akornanniikkumaarluta.

Ikinngutinnersumik



Hjalmar Dahl

Inuit Issittormiut Siunnersuisoqatigiiffiat, Kalaallit Nunaat

Siulittaasoq